

Dörfligeischer 1993

Ds Paris, dört hetts der Eiffelturm,
In Pisa steit e schiefe Turm,
Dass 's üser Stadt rächt schitter geit,
Isch mit em 'ne Biispiel schnäu beleit:
Ds Wahrzeiche vo Biel, das isch verglemi
Es Ghüderverbrönnigsöfelichemi !

Früecher hett me unbestritte
De Landesverräter der Gring abgschnitte,
Hütt' wüsse si nümme, was si wei,
Zersch chunnt är i d' Chischte, de wieder frei,
Und isch är de vo sälber gschorbe,
Wärde wäg sim Schnäbi no d' Froue verdorbe !

D' Bieler Wahle si verbii,
Vieu nöii Gsichter si jetz derbi,
Doch im Stadtrat hei si nüümme z' lache,
Si müesse jetz Ueberstunde mache,
Denn wenn der Theo afot schnurre
De isch d' Wuche scho fasch dure !

E Mentadent-Zahnwissi Wulkemasse
Wird d' Ambre Solaire-Sunne nid schiine lasse,
Und i jeder Lenor-früsche Höhelag,
Git's e Henniez-artige Niederschlag,
Mit däm Wätterbricht wird's üs hoffentlech glinge
Für üs Dörfligeischer e Sponsor z' finge !

Der schwuul Asylante-Sekretär,
Dä schmachtet jetz ir Chischte schwär,
Was mach ig hie ohni Fudi-Loch?
So liebi Richter, gät ihm doch
E Picku und e Schufle, do geisch abe,
De cha-n-är für e-n-Ogi go NEAT-Löcher grabe.

Das isch kei Hundsgagu vom Hasso,
Und ou keis Biudli vom Picasso,
S'isch ou kei Foti vom 'ne Muetermal
Oder vo'r Chästeilet im Justistal,
Jetz blibt üs eigentlech nume no weni :
S'isch e Nochufnahm vom Schneider Vreni.

Uesi Dütsch-Schwiizer si strammi Lüüt,
Dä cheibe EWR, dä seit ne nüt.
Nous desirons d'entrer à l' Europe unie,
A l' EEE nous disons Oui,
Für üs Geischer isch drum der Blocher Chrigu,
Ab sofort der Röschtigrabe-.... !

Vom fändrige Gmeinrat isch nur der Stöckli
Als einzige gumpet über ds Böckli,
Der Glas u der Berthoud, lö sech nid lo lumpe,
Die zwe, die wei scho gar nümme' gumpe,
Der Haller u der Arnold, s'isch nid übertriebe,
Si im eigete Schiisdräck stecke bliibe !

Sit 25 Jahr git's der Schnitzubank-Obe,
Derfür tüe mir jetz d' Zunft chlei lobe.
Sit 45 Jahr tüe mir scho singe,
Und euch all Jahr paar Värslu bringe.
Was schliesse mir Geischer jetz do druus ?
Mir si der Zunft 20 Jahr voruus !